

KONGRE INTERNASYONAL LALIT Fevriye 2008

Fas a nuvo faz imperyalism, Le Parti, Program-la, Klas Travayer, internasyonalism.

Bi sa premye papye-la, se pu fer enn konsta sityasyon aktyel depi pwin de vi lalit revolisyoner pu sosyalism, pu lye ansam bann eleman ki konstitye sa konsta-la, ek pu etablir enn lankadremman pu bann lezot tem ki nu finn swazir pu debat pandan sa kongre-la.

Tu sanzman radikal an faver lamas dimunn, li dimann enn konba politik konsyan ki kapav fer selman a traver enn lorganizasyon politik, enn Parti; li dimann enn program politik ki baze lor tranzisyon depi seki nu ena zordi a seki nu pe vize a lon term, ek li depann lor mobilizasyon diferan klas ek grup deryer sa program-la. Li evidan ki se klas travayer ki pu a lavangard dan lalit pu sosyalism, enn lalit ki ena enn laspe internasyonalist.

Pu komanse kitfwa li ti pu bon si nu sey analiz bryevman bann faktor ki responsab pu zistifye rezon kifer nu dir ki nu ena anfas de nu, enn “nuvo faz imperyalism”.

- Rol relatif bann laparey deta peyi imperyalist, konpare ek rol bann konpayni prive miltinasyonal dan desinn profil prezans imperyalist.
- Mobilite kapital o-nivo mondyal, ek rol dominan kapital finansye konpare ek kapital dan prodiksyon.
- Rol delokalizasyon inite prodiksyon pu diminye kud prodiksyon, ek rediksyon saler reel travayer.
- Ranplasman bann konvansyon komersyal post-kolonyal baze lor “preferans”, par bann “lakor partenarya ekonomik” rezyonal, impoze su presyon WTO.
- Imigrasyon masif, ant diferan peyi osi byen ki a linteryer mem peyi ubyen blok.
- Dezekilib ekolojik, resofman planet ek sanzman klimatik (lasesres ek inondasyon) ki pe afekte prodiksyon nuritir. An mem tan rediksyon dan stok lenerzi fosil pe ankuraz prodiksyon byo-karbiran ek diminye ankor plis prodiksyon nuritir. Sekirite alimanter pe vinn enn problem pu tu peyi, mem seki ris.
- “lager kont terorism” pe servi kuma enn pretext pu invazyon ek lokipasyon militer, pu fer vot bann lalwa ki atak drwa fondamantal par kree enn sikoz sekiriter.
- Rol intelektuel ek akademik ti-burzwa ki zordi su ezemoni ideoloji kapitalist, ek zot propagann konstan kont lalit pu sosyalism.

Reaksyon:

Ki bann sanzman nu pe truve dan devlopman lalit politik pu sosyalism?
Le Parti: Fas a bann faktor ki nu finn mansyone, eski ena refleksyon ek devlopman apropiye dan lalit politik o-nivo nasyonal, rezyonal, ek internasyonal?

Partu nu pe truv lenerzi pe al plito dan direksyon kuran "altermondyalist", ek lanfaz lor rol sosyete sivil ek muvman sosyal. Sa pe arive o-detriman devlopman lorganizasyon politik, sirtu parmi zenn ek travayer, sa pe arive aster-la mem dan Moris kot serten lorganizasyon de gos pe oryant dimunn ver kuran altermondyalist, plito ki ver enn langazman politik. Mem ansyen kuran erone "nasyonalist" paret finn balye par ideoloji dominan ki globalizasyon propaze, apar dan serten peyi Lamerik Latinn.

Program: Dan labsans enn program politik, buku lenerzi al dan rezistans a sanzman, ek dan propozisyon reform minimal; mem "reform" aster ule dir lekotrer de seki li ti abitye ule dir. Dan plas reflesi ek azir pu konbat inegalite, buku dimunn panse ki plito viz mobilite sosyal a-traver ledikasyon baze lor metod ortodox, konpetisyon, ek non-itolizasyon langaz maternal. Konsep enn sanzman radikal dan mod prodiksyon ek dan natir leta nepli paret lor azanda.

An paralel nu pe truv lamonte "rezistans kiltirel" ek integrism relizye kuma manyer pu konbat imperyalism. Dan plas refleksyon ek organizasyon, pe ena devlopman kuran obskirantist ek suvan anti-fam.

Klas Travayer: Rapor de fors de klas pe sanze ek afeblisman klas travayer: travayer pe les limem antrene dan konpetisyon komersyal ant burzwazi diferan nasyon; dan plas enn kordinasyon ant muvman sindikal diferan peyi pe gayn konba kont delokalizasyon pu prezervasyon lanplwa; pe ena imigrasyon de mas (ki leta pe ankuraze, parey kuma dan bann lane 70), ek suvan sa pe amenn devlopman reflex zenofobik parmi lamas dimunn ki pe sufer aköz somaz ek inflasyon. Partu nu pe truv inkapasite lorganizasyon klasik klas travayer, muvman sindikal, pu depas konba pirman defansiv, ek pu met an kestyon lozik sistem kapitalist ki responsab. San met an kestyon lozik kapitalist, birokrasi sindikal suvan pa kapav mem defann lintere a-kur-term travayer, nu finn truv sa otur lisansiman masif VRS ek Blue Print dan Lindistri Sikriyer. Ogmantasyon prekarite dan lanplwa pe diminye mem sa rol limite ki sindika ti ena, an mem tan ki somaz pe afekte travayer fam plis.

Ena bann gran mitasyon o-nivo muvman sindikal mondyal, me zot bann sanzman plis birokratik ki programatik.

Konklizyon

Travay ki nu ena pu fer dan sa trwa zur nu Kongre, se reflesi ek diskrit lor bann tem prinsipal ki diferan papye pu kuver. Sa bann tem la reprezant inpe nuvo refleksyon ki nu finn fer an term programatik. Pandan Kongre, ansam nu pu sey konsolid sa aki programatik ki nu finn fer dan dernye 3-4 an: me an mem tan nu pu bizin gard an tet ki enn program, mem si li byen zoli, si li pa ena enn lorganizasyon politik for deryer li, ek si li pena sutyen klas travayer, li pu rest enn program lor papye. Sa usi li bizin nu preokipasyon pandan sa kongre la.